

Pillilpiv

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemao iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi aqduq

Gevq-a nail aqyanq neq, A.D. 61 kovq niidai bhai gevq-a nail ngaol. Gaqkhoel Paolluv Lolmav nail thaonq bhai iqmoeq ilmoeq khe pov aol thailthaiq-u phao, gevq-a nail ngaol. Pillilpiv haoqgavq iqsanl, thaonq bhai aol khi gevq-a nail haoqgavq al juq nail lavqkhoel bhai aol nail ngaol.

Khaq sil gaq bhai gevq bhiq-a nail

Haoqgavq niil keiv neq, Pillilpiv meenq khe Khali yaq munl bhai gevq bhiq-a nail ngaol. Pillilpiv meenq khe jaol nail Yeiqsul Khali nail tsaol-aq juq bhai maqkhaiq, Khali yaq munl bhai heldaiq phail nail juq khi mail tsaojao-ai nail juq bhai maqkhaiq, haoqgavq niil gevq bhoel-aivq leevq-a nail ngaol. Pillilpiv meenq neq, hulmeeq hulbhao Lolmav nail meenq ngaol.

Pillilpiv meenq yaq juq, Lolmav nail tsaol-aq pevq nail neekhaol sil deede nail khe-ai, gaqkhoel Paolluv “Ngadao neq, nqtavq bha tavq lai nail tsaol-aq ngaol” dai, gaq bivq-a nail ngaol. Pillilpiv meenq bhai Yuldav nail tsaol-aq maodai

maq jaol nail ngel-i mail, Yuldav tsaol-aq nail uqhuq thaoq nail ilkhaol maq cov-ai thaq-al. Alheel ngel-i mail, Paolluv yaoq meenq yaoq bhai daoq cavq cavq ail-u khe-ai, uqhuq thaoq nail ilkhaol lavqkhoel bhai maq ngel nail, meenq meenq jail bhai jiav nail laoljaol daolbhaq bhai jaol khi cavq bhiq cov bhiq-a nail ngaol. Luldil dai mil nail yaqmai-aq teevq gaq khi mail thaonq bhai heldaiq phail nail aqivq teevq gaq nail ildaog bhaqda nee, Khali yaq munl mao lal-a nail ngaol.

Paolluv Miqyail nail ganl nl-a nail bhala aqheeq aqphoiq maq oil-al. Miqyail nail ganl nl nail haqbhoil haqphal saiqgov guvq-a nail ngaol. Thailhai ngaol-aog, Pillilpiv meenq khe jaol nail Khali yaq munl Paolluv Miqyail nail ganl nl nail bhai phul danq khi tsaojao-ai bhiq-a nail ngaol.

Khul bhai noeqthunq khi gevq-a nail

Paolluv Lolmav nail thaonq bhai aol thailthaiq-u phao, Pillilpiv meenq khe Khali yaq Ilb-haqphaoqdil bhai khoel khi aqyu juq-i mail danq-a nail phul Paolluv bhai bhi bivq lai-a nail ngaol. Alheel ngel-i mail, Paolluv geeqlaoq eeq naol dai, ge nail haqbhoil haoqgavq nil keiv gevq-a nail ngaol. Paolluv haoqgavq nil keiv gevq-u phao, Pillilpiv meenq khe Khali yaq munl tsel kovq bhee lal-aog nail ngaol. Paolluv aqyu juq bhai haoqnao naosaq moel-a nail hail kovq bhee lal-a nail ngel-i mail, mee nia phaqaq nail ganl, lavqkhiq tsail nail ganl bhai daoqthaoq thaoq khi gaq bivq-a nail ngaol.

Ilbhaqphaoqdil Pillilpiv meenq khe Khali yaq munl-i mail bivq-a nail phul oil khi, Paolluv bhai bivq lai-u phao, mailma-ail nal-a nail ngaol. Thailhai ngaol-aog, nal nail al meeq lai-u phao, Paolluv-i mail gevq-a nail Pillilpiv haoqgavq niil keiv oil khi, bhi kovq lai-a nail ngaol.

Iqmoeq ilmoeq khe daoq

¹ Yeiqsul Khali nail yaqkav pevq nail Paolluv khi Tilmolseiq nv-nvq gaq, Pillilpiv meenq bhai jaol nail Yeiqsul Khali bhai neema thaqtsool nail Miqyail nail tsaol-aq juq bhai maqkhaiq, Khali yaq munl bhai heldaiq phail nail juq khi tsaojao-ai nail juq bhai maqkhaiq, haoqgavq niil gevq bhoel-ai leevq-a nail ngaol.

² Ngadao nail Aqbhu Miqyail khi Heeqphaq Yeiqsul Khali nail geeqlaoq eeljaol khi neesal-ovq nail pha q nuljuq nail kovtavq bhai jlav dei-eiq.

Pillilpiv meenq bhai jaol nail Khali yaq juq nail haqbhoil geeqlaoq hal nail ganl

³ Ngal nuljuq bhai khal noeq dov lal-u phao, ngal ngaq nail Miqyail bhai tsiqeeq naol.

⁴ Nuljuq iqsanl nail haqbhoil ngal geeqlaoq hal-u phao, yaoq pov yaoq-ao nee lavqkhiq tsail lal nail ngaol. ⁵ Khul khi mail dai ngal-aq neq, lavqkhiq tsail nail geeqlaoq daoq nuljuq jaol nail bha

iqmoeq ilmoeq cavq lavq-u n-gaol nee yanqgaol kev dai, nuljuq ngaq bhai tsaojao-ai lavq-a nail ngaol. ⁶ Nuljuq nail lavqkhoel iqmoeq ilmoeq

aqmeeq pha q nl-a nail Miqyail neq, Yeiqsul Khali yavq kha lee nail aqn bhai kev dai ganl al juq nl

gil nail ngaol dai, ngal maldil neema thaqtsaol nail ngaol.

⁷ Ngal nuljuq bhai khaq mao iqsanl gaiq-a nail ngel-i mail, nuljuq nail haqbhoil alhai noeq nail neq, tsaq nail ngaol. Ngal thaonq bhai aol-u phao maqkhaiq, lavqkhiq tsail nail geeqlaoq daoq ivqdao dai pevq lal dai maqkhaiq, yalkhaq dal nail juq nail siltavq bhai geeqlaoq daoq al ge lai-u phao maqkhaiq, nuljuq Miqyail nail geeqlaoq eeljaol bhaqda nee, ngaq bhai tsaoljaolai lavq-a nail ngaol. ⁸ Yeiqsul Khali nail gaiq-a deede nail pha-i mail ngal nuljuq iqsanl bhai khadai noeq moel khi, khadai gaiq-a nail ngel-ail dai, Miqyail heeq nia nail ngaol.

⁹ Nuljuq nail lavqkhoel bhai goil nail gaiq-a nail phaq teevq pov nee teevq pov mao lal dai, ngal geeqlaoq hal nail ngaol. Goil nail gaiq-a nail al bhaqda nee nuljuq maodai pha bhai aqduq aqtsil tsil dai heeq nia lal dai maqkhaiq, tselpav bhoilpav nia nail pha bhai nuljuq nail lavqkhoel bhai mao lal dai maqkhaiq, geeqlaoq hal nail ngaol. ¹⁰ Alhai pevq lal haq neq, iqsanl nail lavqkhoel-ai meeq jaiq nail pha bhai nuljuq tselpav nia lal nail ngaol. Al ovqtavq, Khali yavq kha lee nail aqn bhai kev dai, nuljuq nail lavqkhoel bhai maq meeq nail pha maq aol dai, oeqbal thaq duq maq jia dai pevq lal nail ngaol. ¹¹ Aq-u phao, Miqyail nail seiqleiq khaqsail bhi dov lal khi, yu Miqyail bhai tsiqeeq lal dai, Yeiqsul Khali taivq-ail nl nia nail tsaq nail daol nail al pha, nuljuq aqdoevq doevq nail lavqkhoel bhai bhee lal nail ngaol.

Ngal niil aq-il aqdoevq doevq nail neq, Khali ngaol

¹² Aqivq jaqbheq juq-ol, ngal ya daq thailthaiq nail niil neq, lavqkhiq tsail nail geeqlaoq daoq bhi gaiq-ail nail ngel lao thaq nail niil dai, nuljuq bhai bhi heeq kivq movq nail ngaol.

¹³ Khali nail haqbhoil nee ngal thaonq bhai ya aol thailthaiq nail ngaol dai, heeqphaq nail ilkhaol bhai heldaiq phail nail genl dev nail juq khi yaoq juq yaoq iqsanl ya heeq nia-a nail ngaol.

¹⁴ Ngal thaonq bhai ya aol-a nail bhaqda nee, aqivq jaqbheq maodai teevq pav, Yeiqsul nail lavqkhoel neema ivq lal-a nail ngaol. Al ovqtavq, geesil nail neema maq aol dai, Miqyail nail daoq cavq bhiq tseq lal-a nail ngaol.

¹⁵ Tsaol-aq teevq pav ganav juq neq, neekhaol maq sil dai, jil pheeljaq movq nail lavqkhoel nee Khali nail ganl cavq bhiq nail ngaol, ngal heeq kivq nail ngaol. Thailhai ngaol-aoq, teevq pav ganav juq neq, aqmeeq pha q dov lal dai noeqthunq khi cavq bhiq nail ngaol. ¹⁶ Al juq neq, goil nail gaiq-a nail lavqkhoel nee nl nail ngaol. Khul khi mail dai ngal-aq neq, lavqkhiq tsail nail geeqlaoq daoq cavq nail bhai lovpqphail nail haqbhoil, Miqyail ngaq bhai khoel-ai thaq nail ngaol dai, aqyu juq heeq nia nail ngaol.

¹⁷ Yaoq juq yaoq neq, neema daolcoev dai thaq khi, Khali nail ganl cavq nail maq ngel-ail. Yovqgavq nail haqbhoil saol-nvq khi nl-ail teevq-eel ngaol. Thaonq bhai aol nail ngaq bhai iqmoeq-u nee maqtsil bhi daq naol dai noeq khi, cavq bhiq-ail teevq-eel ngaol. ¹⁸ Thailhai ngaol-aoq, khul maq khi-ail. Neema daolcoev

dai thaq khi, cavq nail maqkhaiq, neema maq daol mail cavq nail maqkhaiq, Khali nail ganl khal cavq kivq nail khe-ai cavq haq neq, ngal lavqkhiq tsail nail nee ovqtavq, iqmoeq phao iqsanl, lavqkhiq ya tsail nail ngaol. ¹⁹ Khul khi mail dai ngal neq, nuljuq geeqlaoq hal nail ngel-i mail maqkhaiq, Yeiqsul Khali nail Aqhaqlal tsojao-ai lavq nail ngel-i mail maqkhaiq, ngaq-i mail ya daq thailthaiq nail niil nail lavqkhoel nee ngal ya jel-ail nail ngaol dai, heeq kivq naol. ²⁰ Ngal noeqthunq khi oil movq deedee nail phaqq neq, niailhai ngaol. Yaoq phaqq yaoq-ao nee nail lavqkhoel bhai ngal maq ya haqsil dai, jel lal-u phao khe-ai niil aq-il iqsanl, ngal geesil nail neema maq aol dai, doevq nail maqkhaiq, sil nail maqkhaiq, ngal ngaq nail aqmaol lavqkhoel bhai Khali bhai thaqqeeq thaqqheel naol. ²¹ Ngal aqdoevq doevq nail neq, Khali ngaol. Ngal sil haq neq, ngaq nail haqbhoil jailjeqq pevq nail ngaol. ²² Ngaq nail aqmaol aqdoevq doevq haqq neq, ngal Miqqyail nail ganl nl nail haqbhoil ganl tsoiq nail ngaol. Alheel ngel-i mail, sil nail phaqq khi doevq nail phaqq, niil nvq phaqq nail lavqkhoel ngal khul phaqq bhai tsel heeq dai, maqq heeq lal-il. ²³ Ngal al nvq phaqq nail gaiqlaqq bhai thulphaol-nvq thaqq nail ngel-i mail, noeq-u maqq dov-il. Ngal oil movq nail phaqq neq, kovq lai khi Khali nee mail jaol movq-ail nial. Niil neq, ngaq nail haqbhoil meeqq jaiqq nail ngaol. ²⁴ Thailhai ngaol-aqq, ngal ngaq nail aqmaol lavqkhoel-ai aqdoevq doevq haqq neq, nuljuq nail haqbhoil ganl tsoiq jaiqq nail ngaol. ²⁵ Ngal ya doevq nail ngaol dai, aqduqq bhao nail ngaol. Nuljuqq eeqq lal heel lal

khi neema thaqtsaol nail lavqkhoel lavqkhiq bhi tsail nail haqbhoil ngal nuljuq iqsanl nee mail jaol nail ngaol. ²⁶ Alheel ngel-i mail, ngal nuljuq jaol nail bha gaoq kovq lee-u phao, ngal bhaqda nee nuljuq Yeiqsul Khali nail lavqkhoel bhai, iqmoeq-u nee maqtsil lavqkhiq tsail nia jaiq lal nail ngaol.

²⁷ Khalhai pevq lal gaoq Khali nail lavqkhiq tsail nail geeqlaoq daoq bhai geel-nvq dai, aqdo-evq doevq yaoq. Alhai doevq haq neq, ngal kev lee khi nuljuq bhai ya moel-u phao maqkhaiq, nuljuq nee mail maq jaol-u phao maqkhaiq, nuljuq neema teevq heeq taivq-ail tavq khi ivq-dao dai jaol nail nee ovqtavq, neenoeq noeq nail pha q teevq pha q taivq-ail noeq nail lavqkhoel nee lavqkhiq tsail nail geeqlaoq daoq bhai tavq nail neema thaqtsaol nail pha q nail haqbhoil laijai deede nee ganl ngal ya gaiq nail gal duq ngaol. ²⁸ Nvjuq bhai neejiav jiav nail tsaol-aq bhai teevq peivq-ail tha q geesil. Maq geesil haq neq, aqyu juq bhai niil nvq pha q bhi moel nail ngaol. Aqyu juq neq, ya luq ya seil-ail khi, nuljuq neq, Miqyail nee mail dov lee-a nail hevqkovq nail pha q ya tha q nail nial dai, aqyu juq ya heeq ya moel nail ngaol. ²⁹ Khul khi mail dai ngal-aq neq, Khali-i mail nuljuq bhai bivq-ai tha q nail mee q deede nee geeqlaoq al neq, aivq bhai neema thaqtsaol nail pha q taivq-ail maq ngel-ail. Aivq nail haqbhoil khoeq nail jio vq nail bhai ya da q nail pha q iqsanl aol nail ngaol. ³⁰ Nuljuq khi ngal neq, teevq pha q bhai taivq-ail dev pheeljaq thailthaiq nail ngaol. Genl dev pheeljaq nail niil pha q bhai jel lal-u phao iqsanl mail, ngal dev

pheeljaq nail bhai nuljuq ya moel khi, niil aq-il iqsanl ngal dev pheeljaq thailthaiq nail ganl nuljuq ya gaiq thailthaiq nail ngaol.

2

Yeiqsul Khali neenuq neebeiv aol nail ganl

¹⁻² Alheel ngel-i mail, Khali bhaqda nee gaq kav lal nail pha q maqkhaiq, aivq goil nail gaiq-a nail bhaqda nee neema sal lal nail pha q maqkhaiq, Aqhaqlal Miqyail nail lavqkhoel aqtsaoq tsa oq nail pha q maqkhaiq, yu nail haqbhoil saol-nvq khi gaoqhaq nail pha q maqkhaiq, niil juq nuljuq nail lavqkhoel bhai aol haq neq, ngal lavqkhiq tsail deede lal nia dai, niailhai nl yaoq. Nuljuq neema teevq heeq taivq-ail, goil nail gaiq-a nail teevq pha q taivq-ail, neeno eq needul iqsanl teevq pha q taivq-ail noeq yaoq. ³ Jil pheeljaq khi neema eeq nail heel nail lavqkhoel nee khul teevq pha q iqsanl tha q nl. Tha qtheq nail neema aol nail lavqkhoel, teevq ga q nee teevq ga q yovqgavq nail aqmaol nee maqtsil yu bhai tha qeeq yaoq. ⁴ Yovqgavq bhai tavq nail pha q bhai taivq-ail tha q saol-nvq. Yu bhai tavq nail juq bhai iqsanl saol-nvq yaoq.

⁵ Yeiqsul Khali neema tha q nail khe-ai, nuljuq iqsanl tha q yaoq.

⁶ Aivq neq,
Miqyail pevq nail pha q
teevq bhee
teevq lovq aol nail ngaol.
Thailhai ngaol-a oq,
Miqyail khe-ai

pevq nail phaḡ bhai
 ivqdao dai nieivq thaiq-ai
 thaḡ nail neḡ,
 tsaḡ nail ngaol dai,
 maḡ noeq-ail.

⁷ Aivq nail seiḡleiḡ khaoqsail
 loev ha-ail ceevq khi,
 yaḡkav pevq nail bhai
 daḡ khi mail
 tsaol-aḡ khe-ai
 doevq lee-a nail ngaol.

Al ovqtavq,
 aivq maldil tsaol-aḡ ngaol dai,
 yu ya moel-a nail ngaol.

⁸ Aivq neḡ,
 aivq nail aḡmaol bhai
 thaḡtheḡ khi,
 sil-u phao kev dai,
 Miḡyail nail daoḡ
 naldaiḡ-a nail ngaol.
 Sil-a nail al neḡ,
 lavqyavq kovtavq-ai
 khanḡ sil-a nail ngaol.

⁹ Alheel ngel-i mail,
 Miḡyail aivq bhai
 iḡsanl nail kovtavq bhai
 thaḡeeḡ thaḡheel khi,
 aḡmil iḡsanl
 nee mail maḡtsil
 eeḡ dee moe
 deedeē nail aḡmil
 aivq bhai
 mil bhiḡ-a nail ngaol.

10 Nqtavq kovtavq bhai
 jaol nail maqkhaiq,
 miltsaq kovtavq bhai
 jaol nail maqkhaiq,
 miltsaq nail daoqthaoq bhai
 jaol nail maqkhaiq,
 khal jaol nail
 yaoq pha q yaoq-ao nee,
 Yeiqsul nail aqmil
 kov-uvq bhai
 peevqceevq kovdoi q
 ya doi q nail ngaol.

11 Al ovqtavq,
 Aqbhu Miqyail
 seiqlai q khaoqsail ya dai,
 moeqthaoq yaoq
 thaoq yaoq-ao nee,
 “Yeiqsul Khali neq,
 Heeqphaq ngaol” dai,
 salkhil ya khanq nail ngaol.

Miltsaq kovtavq bhai aqbhaq bhaq nail ganl

12 Ngal mao-ail gaiq-a nail aqtsaoq juq-ol,
 nuljuq khaq mao iqsanl ngaq nail daoq naldai q
 nail ngaol. Ngal nuljuq nee mail jaol-u nee
 maqtsil ngal nuljuq nee mail maq jaol-u phao
 iqsanl, ngaq nail daoq aqmeeq-ai naldai q yaoq.
 Nuljuq yovqgavq nail hevqkovq nail pha q ya
 kivq dai, geesil khi aqjuq juq nail lavqkhoel
 nee laijai deedee yaoq. 13 Khul khi mail dai
 ngal-aq neq, Miqyail neema tsaq nail khe-ai,
 nuljuq nl movq nail neema aol lal khi nl nia dai,

aiVq nuljuq nail lavqkhoel bhai nl thailthaiq nail ngaol.

¹⁴ Nuljuq khal nl khal hal nail yaoq phaQ yaoq-ao nee nail lavqkhoel bhai, khul nail daoqgovq maq dov, maq jil pheeljaq dai, nl yaoq. ¹⁵ Alhai nl haq neq, oeqbal thaQ duq maq jiaV nail tsaol-aq khi, neema haol nail tsaol-aq pevq nail ngaol. Neema neegovq aol khi neema pov pov lav lav-ail pevq nail niil yeel nail tsaol-aq nail lavqkhoel bhai jaol-u phao, nuljuq neq, laiQ nail tsa nail phaQ maq aol nail Miqyail nail yaq pevq nail ngaol. Al ovqtavq nuljuq neq, niil yeel nail lavqkhoel khe jaol nail tsaol-aq bhai aqbhaq bhaq bhiq nail ngaol. ¹⁶ Aqbhaq bhaq bhiq nail al neq, aqdoevq bhi doevq lal nail daoq cavq cavq nail phaQ pevq nail ngaol. Alheel ngel-i mail, Khali kovq lee haq neq, ngal neema eeq duq niailhai ya nail ngaol. Ngaq-i mail tsaol-a nail neq, aqnieivq-ail maq ngel-ail. Ngaq-i mail nl doil hal doil-a nail iqsanl, aqnieivq-ail maq ngel-ail. ¹⁷ Nuljuq-i mail neema thaQtsaol nail phaQ neq, Miqyail bhai laol bhiq nail phaQ khe-ai, dul nail ngaol. Laol bhiq nail al nail kovtavq bhai ngaq nail aqsivq ya hoeldav khi ngaol-aoq, ngal lavqkhiq tsail deede nee nail ngaol. Nuljuq nee mail iqsanl lavqkhiq tsao tsail naol. ¹⁸ Alhai dul dai, nuljuq iqsanl lavqkhiq tsail yaoq. Ngaq-ai nee mail iqsanl lavqkhiq tsao tsail yaoq.

Tilmolseiq khi Ibhaqphaoqdil nail ganl

¹⁹ Mao-ail maq maol lal mail, ngal Tilmolseiq bhai nuljuq jaol nail bha bhi lee naol dai, Heeqphaq Yeiqsul nail lavqkhoel bhai noeqthunq-ai

thaq nail ngaol. Ngal nuljuq nail ganl ya heeq kivq haq neq, gaq aol lal nail ngaol. ²⁰ Khul khi dai ngal-aq neq, aivq khe-ai dul dai, neema thaqtsaol nail tsaol-aq teevq gaq-ail ngaq-ai nee maq jaol-ail. Aivq neq, nuljuq nail haqbhoil maldil aqmeeq phaqa saol-nvq bhi nia nail gaq ngaol. ²¹ Yaoq juq yaoq neq, Yeiqsul Khali nail haqbhoil aqmeeq phaqa maq halpov mail, yovqgavq nail haqbhoil meeq lal dai taivq-ail, halpov nail ngaol. ²² Thailhai ngaol-aq, nuljuq Tilmolseiqa nail neema bhai heeq nia nail ngaol. Yaqyov teevq gaq yovqgavq nail aqbhu nee mail ganl nl nail khe-ai lavqkhiq tsail nail geeqlaqa daqa gaiqa doi-ail dai, aivq ngaq-ai nee mail ganl nl-a nail ngaol. ²³ Alheel ngel-i mail, yu ngaq bhai khalhai khi lavq nail ganl bhai ngal yaq heeq kivq-u phao, teevq pov taivq-ail aivq bhai nuljuq jaol nail bha bhi lee naol dai, ngal noeq nail ngaol. ²⁴ Ngal iqsanl maol-ail maq maol lal mail nuljuq jaol nail bha lee naol dai, Yeiqsul nail lavqkhoel bhai neema thaqtsaol naol.

²⁵ Thailhai ngaol-aq, niil aq-il, ngaq nail jaqbheq Ilbhaqphaoqdil bhai nuljuq jaol nail bha iqmoeq bhi kovq lee nail neq, tsaq-ail ngel jaol-aq dai, ngal noeq nail ngaol. Aivq neq, ngaq-ai nee mail teevq gaq khe-ai ganl nl nail nee ovqtavq, ngaq-ai nee mail teevq gaq khe-ai aqhaqlal phao khe genl dev nail gaq ngaol. Ngal loq nail phaqa bhai bhi tsaol-ai nail dai khi, nuljuq-i mail khoel-ai thaqa nail gaqkhoel iqsanl ngel naol. ²⁶ Aivq nuljuq iqsanl bhai noeq moel-ai bhiq nail ngaol. Aivq nal nail ganl nuljuq ya gaiqa-a nail ngel-i mail, aivq noeqhaq deede-ai

bhiq nail ngaol. Alheel ngel-i mail, ngal aivq bhai bhi kovq lee nail ngaol. ²⁷ Aivq sil heeq phaqaail nal deedee-a nail ngaol. Thailhai ngaol-aoq, Miqyail aivq bhai gaoqhaq-a nail ngaol. Aivq bhai taivq-aail gaoqhaq nail maq ngel-aail. Ngal noeqhaq deedee nail bhai maq bhi noeq haq jaiq lal dai, ngaq bhai iqsanl gaoqhaq lavq-a nail ngaol. ²⁸ Nuljuq aivq bhai ya moel-u phao, lavqkhiq tsail lal dai maqkhaiq, ngal khaoqlaol nail micil maq gal lal dai maqkhaiq, ngal aivq bhai lavqtsail mail bhi kovq lee naol. ²⁹ Yeiqsul bhaqda nee, lavqkhiq teevq tsail aivq bhai hav yaoq. Aivq khe-ai dul nail tsaol-aq juq bhai ev yaoq. ³⁰ Khul khi mail dai ngal-aq neq, nuljuq-i mail ngaq bhai tsaojao-ai lavq-a nail, maq bhee nail juq bhee lal dai, aivq nail aqmaol av bhiq khi Khali nail ganl nl nail ngel-i mail, micil maq ngel-aail nul neq, sil lao-aoq nail ngaol.

3

Maldil tsaq nail daol nail phaqaail nail ganl

¹ Aqivq jaqbheq juq-ol, haoqnao naosaq khe daoq neq, niailhai ngaol. Yeiqsul nail lavqkhoel bhai lavqkhiq tsail yaoq. Ganl niil nuljuq bhai teevq yanq ngal-aq teevq pov gevq bhoel-ai lavq nail neq, gaq doil maq doil. Khul khi mail dai ngal-aq neq, nuljuq jaol ivq nia dai, ganl tsoiq nail ngaol.

² Kheeq khe-ai dul nail tsaol-aq bhai yaolphaol yaoq. Aqyu juq neq, haqev nail phaqaail nl nail nee ovqtavq, bavkov uqjaq ya oev naol dai, ge nail ngaol. ³ Maldil bavkov uqjaq oev nail juq

neq, ngadao juq ngaol. Khul khi mail dai ngal-aq neq, ngadao juq Miqyail nail Aqhaqlal nail lavqkhoel nee Miqyail bhai uqhuq thaog nail tsaol-aq ngaol. Al ovqtavq, Yeiqsul Khali nail lavqkhoel neema eeq duq jiav khi, aqsivq haqjoil bhai maq juq nail tsaol-aq iqsanl ngel nail ngaol. ⁴ Maldil dai, ge haq neq, ngal aqsivq haqjoil bhai juq movq haq neq, juq kivq naol. Ngal aqsivq haqjoil bhai juq kivq naol dai, yu teevq gaq ganav noeq haq neq, ngal aivq nee maqtsil juq kivq naol. ⁵ Ngal neq, doevq lee khi eivq n bhee lal-al ngal-aq neq, bavkov uqjaq oev-a nail ngaol. Ngal neq, Ilsaqlaiqlal nail jeq-e jaq-a nail lavqkhoel khe, Bheiqyaqmiq nail jeq-e jaq-a ngaol. Heiqbhail nail tsaol-aq lavqkhoel nee doevq lee-a nail, Heiqbhail nail tsaol-aq maldil ngaol. Aoldaoq kovqdaoq phao nee ge haq neq, Phaqliqsail ngaol. ⁶ Ngaq-i mail laijai deede-a nail ganl bhai ge haq neq, Khali yaq munl bhai khoeq bhiq jiovq bhiq daiq-a nail teevq gaq ngaol. Aoldaoq kovqdaoq bhai tavq nail tsaq nail daol nail pha q bhai ge haq neq, oeqbal maq aol nail tsaol-aq ngaol.

⁷ Thailhai ngaol-aog, ngaq nail haqbhoil jailjeq aol naol dai, ngaq-i mail khal saol-nvq-ai tha q nail al juq iqsanl bhai, Khali nail haqbhoil sunq-ail nail pha q pevq lao tha q nail niil dai, niil aq-il saol-nvq-ai tha q nail ngaol. ⁸⁻⁹ Maldil dai, ge haq neq, ngal ngaq nail Heeqphaq Yeiqsul Khali bhai heeq kivq-a nail neq, iqsanl nee maqtsil meeq jaiq nail ngel-i mail, yaoq juq yaoq iqsanl bhai sunq-ail nail juq ngaol dai, saol-nvq-ai tha q nail ngaol. Ngal aivq nail haqbhoil yaoq pha q yaoq-

ao nee bhi sunq-ail gil-a nail ngaol. Ngal Khali bhai ya khi aivq nail lavqkhoel bhai jaol kivq dai, al juq iqsanl bhai yav ha-ai thaq nail pavqkhuq pavq leivq ngaol dai, saol-nvq-ai thaq nail ngaol. Ngal neq, aoldaoq kovqdaoq bhai tavq nail tsaq nail daol nail phaqaq maq jiaav. Khali bhai neema thaqtsaol nail bhai tavq nail tsaq nail daol nail phaqaq jiaav nail ngaol. Tsaq nail daol nail niil phaqaq neq, Miqyail nee mail dov lee-a nail ngaol. Neema thaqtsaol nail ngel-i mail taivq-ail tsaq nail daol nail niil phaqaq bhai ya nia nail ngaol. ¹⁰ Niil aq-il neq, Khali bhai iqsanl, aivq doevq kovq lal-a nail bhaqaq bhai iqsanl, ngal heeq kivq movq-ail nial. Al ovqtavq, Khali-i mail daqaq a nail haq nail aoq nail juq bhai aivq nee mail teevq gaq khe-ai daq daq-ail, aivq sil-a nail khe-ai dul lal dai iqsanl, doevq movq-ail nial. ¹¹ Alheel ngel-i mail, ngal iqsanl sil khi doevq kovq lal nail phaqaq bhai ya kivq-ail jaol-aq dai, noeqthunq deedee nail ngaol.

Paolluv kovpavq ya dai laijai nail ganl

¹² Ngal niailhai ge nail neq, niil aq-il ya gaq-ao naol dai, ge nail maq ngel-ail. Bheeq lal gaq-ao naol dai, ge nail iqsanl maq ngel. Yeiqsul Khali-i mail ngaq bhai aivq nail tsaol-aq bhi pevq lal-a nail khe-ai, kovpavq al bhai ngal ya dai, laijai thailthaiq nail ngaol. ¹³ Aqivq jaqbheq juq-ol, kovpavq al bhai ya gaq-ao naol dai ngal maq noeq-ail. Thailhai ngaol-aq, ngal khaq mao iqsanl nl nail teevq phaqaq neq, haoqnaol phao khe nl jel-ail ceevq-a nail juq bhai nioilpeivq-ail ceevq khi, sivtavq phao nl heeq phaqaq-ail jiaav

nail phaḡ bhai the kheel lai dai, laijai nail ngaol. ¹⁴ Ngal kovpavḡ al bhai ngal the kheel lai dai, laijai nail ngaol. Kovpavḡ al neḡ, Miḡyail Yeiqsul Khali bhai juḡ khi nḡtavḡ kovtavḡ bhai aḡdoevḡ ya doevḡ dai, ngaḡ bhai khul lavḡ-a nail phaḡ pevḡ nail ngaol.

¹⁵ Neema thaḡtsaol nail phao yovkav eeq lal-a nail ngadao juḡ neḡ, neema alhai thaḡ bhel. Niil nail lavḡkheol bhai nuljuḡ-i mail noeḡ nail teevḡ phaḡ ganav maḡ dul lai haḡ neḡ, ganl al juḡ Miḡyail nuljuḡ bhai phaodaiḡ lavḡ nail ngaol.

¹⁶ Ngadao juḡ-i mail khal the kheel-ai thaḡ nail juḡ bhai nieivḡ thaiḡ-ai thaḡ khi, daolcoev dai nl dal laivḡ bhel.

¹⁷ Aḡivḡ jaḡbheḡ juḡ-ol, ngal aḡdoevḡ doevḡ nail khe-ai, nuljuḡ iḡsanl doevḡ yaoḡ. Ngaḡ bhai saol oil khi aḡdoevḡ doevḡ nail tsaol-aḡ juḡ bhai heldaiḡ yaoḡ. ¹⁸ Khul khi mail dai ngal-aḡ neḡ, jel lal-u phao, ngal nuljuḡ bhai mee nia pov ge bhiḡ-a nail khe-ai, niil aḡ-il iḡsanl maivbhil dov dov-ail gaoḡ ge lavḡ bhel. Khali nail lavḡyavḡ bhai neejiaḡ jiaḡ nail tsaol-aḡ maodai jaol nail ngaol. ¹⁹ Tsaol-aḡ al juḡ neḡ, haoḡnao naosaḡ n-gaol luḡ-ail seil-ail nail ngaol. Aḡyu juḡ nail ovḡmav neḡ, aḡyu juḡ nail miḡyail ngaol. Aḡyu juḡ neḡ, haḡsil heeḡ phaḡ-ail tsaḡ nail phaḡ bhai maḡ haḡsil mail, neema eeq nail ngaol. Aḡyu juḡ neḡ, miltsaḡ bhai tavḡ lai nail juḡ bhai taivḡ-ail saol-nvḡ nail ngaol. ²⁰ Ngadao neḡ, nḡtavḡ bha tavḡ lai nail tsaol-aḡ ngaol. Hevḡkovḡ nail gaḡ Heeḡphaḡ Yeiqsul Khali al dao nee mail dov lee nail bhai, ngadao noeḡthunḡ nail ngaol. ²¹ Aivḡ

neq, yaoq pha q yaoq-ao nee bhai aivq nail kov-uvq bhai bhi jaol bhi jiav-a nail bhaqaoq bhai juq khi, seiqlaiq khaoqsail eeq deedee nail aivq nail aqmaol khe-ai pevq lal dai, luq-ail seil-ail nia nail ngadao nail aqmaol bhai aqsivq lav phal lavq-a nail ngaol.

4

Paolluv cavq bhiq cov bhiq nail daoq nail ganl

¹ Alheel ngel-i mail, ngal mao-ail gaiq-a khi moel movq deedee nail aqivq jaqbheq juq-ol, nuljuq neq, ngaq nail lavqkhiq tsail duq khi ngaq nail heel uqtsaoq ngaol. Ngal mao-ail gaiq-a nail aqtsaoq juq-ol, nuljuq Yeiqsul nail lavqkhoel bhai ivqdao dai, doevq yaoq.

² Nul-nq nvq gaq Yeiqsul nail lavqkhoel-ai tsaq lai jil lai yaoq dai, ngal Ilbhaoldil khi Sultuv bhai hal nail ngaol. ³ Ngaq-ai nee mail teevq gaq khe-ai, ganl nl daiq-a nail gaq-ol, naol iqsanl yaqmai-aq al nvq gaq bhai tsaojao-ai bhiq yaoq dai, ngal naoq bhai hal nail ngaol. Khul khi mail dai ngal-aq neq, lavqkhiq tsail nail geeqlaoq daoq gaiq doi ail dai, aqyu nvq gaq ngaq-ai nee mail tsao nl lavq-a nail ngaol. Gaqleiqmeiq khi aqdoevq bhi doevq nail haoqgavq phaldoiq lavqkhoel bhai aqmil gevq bhoel-ai thaq nail yaoq juq yaoq iqsanl, ngaq-ai nee mail tsao nl lavq-a nail ngaol.

⁴ Khaq mao iqsanl, Yeiqsul nail lavqkhoel bhai lavqkhiq tsail yaoq. Ngal teevq pov gaoq ge lavq bhel. Lavqkhiq tsail yaoq. ⁵ Neema neenuq neebeiv aol nail tsaol-aq niil dai, tsaol-aq iqsanl mail naoq bhai heeq nia dai, doevq yaoq. Yeiqsul

kev lee-aiq nail ngaol. ⁶ Khul teevq phaḡ bhai iqsanl khaoḡ thaḡ laol. Nuljuḡ loḡ nail phaḡ bhai khaḡ mao iqsanl, geeqlaoḡ hal-u phao, khal hal movḡ nail khe-ai, Miḡyail bhai tsiḡeeḡ tsiḡeeḡ-ail hal yaoḡ. ⁷ Alhai hal haḡ neḡ, Miḡyail nee mail dov lee-a nail tsaol-aḡ-i mail maḡ noeḡ dov tsaol nail neesal-ovḡ nail phaḡ nuljuḡ nail neema khi nuljuḡ nail neenoeḡ needul bhai Yeiqsul Khali nail lavḡkhoel nee heldaiḡ phail lavḡ nail ngaol.

⁸ Aqivḡ jaḡbheḡ juḡ-ol, haoḡnao naosaḡ khe daoḡ neḡ, niailhai ngaol. Maldil tsaḡ nail phaḡ, yu ev heeḡ phaḡ-ail pevḡ nail phaḡ, tsaḡ nail phaḡ, meeḡ nail haol nail phaḡ, yu heldaiḡ-u phao, gaiḡ-a lal bhiḡ nail phaḡ, heldaiḡ meeḡ nail phaḡ, aḡmeeḡ phaḡ khi tsiḡeeḡ heeḡ phaḡ-ail pevḡ nail phaḡ, niil juḡ bhai nuljuḡ khaḡ mao iqsanl, saol-nvḡ saol-nvḡ-ail jaol yaoḡ. ⁹ Nuljuḡ ngaḡ nail lavḡkhoel bhai ya saol oil, ya hav bhoel, ya gaiḡ ya moel-a nail juḡ bhai nl dal laivḡ yaoḡ. Alhai nl haḡ neḡ, neesal bhi ovḡ lavḡ nail Miḡyail nuljuḡ nee mail jaol nail ngaol.

Kovpavḡ nail haḡbhoil geeqlaoḡ eeḡ kovḡ nail ganl

¹⁰ Niil aḡ-il iqsanl teevḡ pov, nuljuḡ ngaḡ bhai noeḡ kev lavḡ nail ngel-i mail, ngal Yeiqsul nail lavḡkhoel-ai lavḡkhiḡ tsail deedeḡ-ail nial. Jel lal-u phao, nuljuḡ ngaḡ bhai noeḡ kev khi ngaol-aḡ, ngaḡ bhai ya tsaojao-ai dai, gailkhaol maḡ daol lal haḡ-al. ¹¹ Ngal teevḡ phaḡ ganav loḡ nail ngel-i mail, niailhai ge nail maḡ ngel. Ngal khul phaḡ bhai ya thaoḡphuḡ khi ngaol-aḡ, al nail lavḡkhoel bhai neekhaol sil dai

heeq kivq lal-aoq nail ngaol. ¹² Haq deede nail pha q bhai maqkhaiq, hulmeeq hulbhao bhao nail pha q bhai maqkhaiq, ngal khanqtsaol lal-aoq nail ngaol. Jaq lovq daol lovq nail pha q bhai maqkhaiq, moevq nail sivq nail pha q bhai maqkhaiq, bhao lee ya lee nail pha q bhai maqkhaiq, haq nail aoq nail pha q bhai maqkhaiq, ngal niil juq bhai khalhai khi daq tsaol nail ganl, yaoq pha q yaoq-ao nee bhai heeq kivq lal-aoq nail ngaol. ¹³ Ngaq bhai gaq bivq lavq nail gaq bhai juq juq-ail, ngal iqsanl bhai nl kivq hal kivq nail ngaol.

¹⁴ Thailhai ngaol-aoq, ngal haq dee aoq deede nail pha q bhai ya daq thailthaiq-u phao, nuljuq tsaojao-ai lavq-a nail ngel-i mail, meeq deede-ail nial.

¹⁵ Pillilpiv meeq bhai jaol nail tsaol-aq juq-ol, ngal lavqkhiq tsail nail geeqlaoq daoq iqmoeq ilmoeq cavq lal khi, Maqgeiqdaolnil milkhaoq nee mail dov ail-u phao, bivq lavq khi tsaojao-ai lavq-a nail lavqkhoel nee aqtsaoq tsaol lavq-a nail neq, nuljuq teevq-eel ngaol. Khali yaq munl yaoq juq yaoq neq, alhai teevq munl iqsanl maq nl lavq-a dai nuljuq heeq nia nail ngaol. ¹⁶ Khul khi mail dai ngal-aq neq, ngal Theilsaqlolni meeq bhai jaol-u phao, ngal loq nail juq bhai nuljuq mee nia pov oil bhoel-ai leevq-a nail ngaol. ¹⁷ Ngal kovpavq bhai oil movq nail ngel-i mail, niailhai ge nail maq ngel-ail dei-eiq. Nuljuq geeqlaoq teevq bhee ya dai ngal movq nail ngaol. ¹⁸ Niil aq-il neq, ngal yaoq pha q yaoq-ao nee jiav lovq-ao nail nee ovqtavq, al jaiq iqsanl jiav nail ngaol. Nuljuq Ilbhaqphaoqdil

bhai khoel khi bhi oil ha lee-a nail kovpavq al juq bhaqda nee ngal teevq bhee jiav nail ngaol. Kovpavq al juq neq, Miqyail neema tsaq nail tovq khi danq nail huqbhiq nil nail pha q khi laol bhiq nail pha q iqsanl ngel naol. Miqyail al juq bhai hav bhoel nail ngaol. ¹⁹ Ngaq nail Miqyail neq, aivq nail mao-ail phoiq mao-ail laoq nail seiqleiq khaoqsail lavqkhoel nee, nuljuq khal loq nail yaoq pha q yaoq-ao nee, Yeiqsul Khali bhai juq juq-ail khi nuljuq bhai teevq bhee teevq lov bivq lavq nail ngaol.

²⁰ Ngadao nail Aqbhu Miqyail bhai nqmaq maqluv halyeel tsiqeeq bhel. Aqmiq.

Haoqnao naosaq khe daoq

²¹ Yeiqsul Khali bhai neema thaqtsaol nail Miqyail nail tsaol-aq iqsanl bhai ngal noeq moel naol geiq dai, ge bhiq-ail dei-eiq. Ngaq-ai nee mail jaol nail aqivq jaqbheq Khali yaq juq, nuljuq bhai noeq moel naol dai, daoq cavq cavq bhoel-ai leevq-a nail ngaol. ²² Niilniai jaol nail Khali yaq iqsanl mail, nuljuq bhai noeq moel naol dai, daoq cavq cavq bhoel-ai leevq-a nail ngaol. Yu nee maqtsil, heeqphaq Gailsaq nail haol bhai ganl nl nail Khali yaq juq nuljuq bhai noeq moel-ai bhiq nail ngaol.

²³ Ngadao nail Heeqphaq Yeiqsul Khali nail geeqlaoq eeljaol nuljuq nail neema lavqkhoel bhai aol dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5